



7. august 2024

UKA 2024/137

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Namminersorlutik Oqartussani pisortaqarfiini allaffissornerujussuup millisarnissaa siunertaralugu, sulinerup pitsaassusaanik innaarliinngitsumik, periutsit suleriaatsillu suut atorunnaarsinneqarsinnaanersut pillugit Naalakkersuisut nalunaarusiornissaannik Inatsisartut aalajangiiffigisassaattut siunnersuut. Nalunaarusiaq UKA2026 nallertinnagu Inatsisartunut agguaanneqassaaq.**

(Inatsisartuni ilaasortaq Aqqalu C Jerimiassen, Atassut)

### **Tunngavilersuut**

Atassummiit anguniagaq tassaavoq pisortat namminersortunut aporfilersuinatik ikorfartuisut. Allaffissornerujussuup annikillisarneratigut suleriaatsit allallu inatsisaasut pisariaqavissunngitsut piiarnerisigut sipaartoqarsinnaanera, pingaarnerusunullu nukiit aningaasallu sunniuteqarnerusumik atorsinnaaleqqullugit. Pisortaqarfiit sullissinerat sukkanerulersikkumallugu namminersortullu nukittorsarumallugit.

Nunatsinni pisortat ingerlatsinerat annertusiartorpoq, namminersortunilu sulisussaaleqineq annertusiartorluni. Taamatut oqimaaqatigiinnginneq iliuuseqarfigisariaqarparput, Atassummiillu akueriinnarsinnaanngilarput pisortat apeqquserneqaratik alliartuaarnerat, apeqquserneqaratillu suleriaatsit inatsisaararpassuillu ilumut sumullu iluaqutaanersut. Pisariaqarsorivarpullu misissussallugu, suunuku aporfigileqqagigut, suunuku allaffissornerujussuarmi tulluarsaaffigisariaqaleqqagigut, nunatsinni aningaasarpassuarnik milluaaginnavileqqasut, namminersortunillu naqisimannillutik.

Atassummiit qulakkeerusupparput pisortaqarfinni suleriaaseq pitsaasumik sukkasuumillu oqinnerusumik ingerlatsisoq, inuiaqatigiinnilu inatsisaaluppasuarnik suleriaatsinillu pisariaqavinnngikkaluartunik artukkarsuisuunani. Aningaasat sunniuteqarnerpaanut atugassaapput, taamaattorlu itisuumik misissuilluarnissaaq pisariaqarpoq massakkut suleriaatsit malittarisassallu sukuiarlugit.

Oqallinneq angusaqarfiulluartoq qilanaarluta kissaatigaarput, qanorlu misissuinissaaq pitsaanerpaamik ingerlanneqarsinnaanersoq eqqartorsinnaagipput, taassumalu kingunissai eqqarsaatigalugit. Siunnersuut pillugu taperserluarneqarnissaaq neriutigaarput.



**Aningaasatigut ingerlatsinikkullu pisortanut kingunerisassai:**

Naatsorsuutigineqassaaq nalunaarusiornissamut ukiuni marlunni AC Fuldmægtigep sulinissaatut naleqassasoq, tamannalu 1.000.000 kr.-mik akeqassasoq naatsorsuutigineqassaaq.

**Namminersortunut aningaasarsiornikkut allaffissornikkullu kingunerisassai:**

Soqanngilaq.

**Innuttaasunut aningaasarsiornikkut allaffissornikkullu kingunerisassai:**

Soqanngilaq.